

傷寒尋源

影印古本醫學叢書之七
上海中醫書局發行

傷寒尋源中集

目錄

發熱

惡寒

惡風

潮熱

寒熱

煩熱

虛煩

煩躁

無汗

自汗

頭汗

附手足汗 盜汗

戰汗

頭痛

附項強

身痛

頭眩

附目眩 搖頭

欬

衄血

耳聾

渴附口苦

口甘

鼻鳴
附鼻如煙煤
鼻如扇張

咽痛

傷寒尋源中集

錢唐呂震名榕村著

發熱

凡發熱必察其表裏有無兼證。而後可窮其發熱之因。其但發熱而表裏別無兼證者。此內傷發熱。不在外。例所謂兼證者。以外兼頭痛惡寒身疼腰痛等證。此邪在表者也。內兼煩渴胸腹痛不大便。或下利等證。此邪在裏者也。發熱特其見端耳。必互勘明確。辨證方的。

凡發熱必責重太陽者。以太陽屬表。統司營衛。而爲諸陽之主氣。經云。陽者衛外而爲固也。外邪之傷人。多由於衛之不固。故論外

傷寒章句
感病必自太陽起。然太陽雖主表，而其根起於至陰。此實表裏上下互相呼應。故由太陽而陽明而少陽，以及三陰，皆互見發熱證。詳列於後。

太陽之爲病，脈浮，頭項強痛而惡寒。不卽發熱也。其惡寒正發熱之機也。論中所稱爲太陽病者，卽指此脈此證而言。他經皆倣此。太陽中風發熱有汗，其脈浮緩。風則傷衛，宜桂枝以解肌。太陽傷寒發熱無汗，其脈浮緊。寒則傷營，宜麻黃以發汗。然桂枝證全在歔熱稀粥以助藥力，取其粲粲微似有汗，不可令如水流漓。至麻黃證始取大發其汗。此麻黃桂枝分治風寒，截然二法，不能混同。施治其或風寒兩傷，營衛同病，經云太陽中風脈浮緊發熱惡寒。

身疼痛。不汗出而煩躁者。大青龍湯主之。又云。傷寒脈浮緩。身不
疼。但重。乍有輕時。無少陰證者。大青龍湯發之。蓋中風脈宜浮緩。
而反見浮緊之脈。傷寒脈宜浮緊。而反見浮緩之脈。卽易桂枝麻
黃之成法。而主用大青龍湯大發其汗。此仲景治風寒之法。成方
具在。而或謂仲景之法。詳於風寒。略於溫熱。此大不然。仲景於風
寒之外。特揭明太陽病發熱而渴。不惡寒者。爲溫病。此其辨證最
要之訣。所以與風寒異者。全在渴不惡寒四字。風寒發熱。必兼惡
寒。今不惡寒。此宜辨者也。風寒發熱。口全不渴。必待傳變之後。口
始作渴。今病初起卽渴。此又宜辨者也。又有所謂濕溫者。經云。濕
家之爲病。一身盡疼。發熱。身色如似熏黃。又云。太陽病。關節疼痛。

而煩脈沉而細者此名濕痺此仲景但言濕不言溫也而以論中所列種種濕證加以發熱而渴不惡寒則濕溫之情狀自可比類而得至於熱病仲景明云太陽中熱者渴是也其人汗出惡寒身熱而渴也此與溫病同一口渴而渴病惡寒溫病不惡寒又自有別仲景處以人參白虎湯則不惟有其法而并有其方矣此太陽病初起發熱辨證之大法乃傷寒切實下手工夫

有謂翕翕發熱者但表不裏也有謂蒸蒸發熱者自裏而表也太陽主表其發熱必兼頭項強痛身疼痛等證此皆太陽之部署純乎表者也至陽明發熱則兼有煩滿口渴等證少陽發熱則兼有胸脇滿痛口苦喜嘔等證而其脈皆主浮太陽之脈或浮緩或浮

緊陽明之脈浮大。少陽之脈浮弦。若脈沉而不浮。三陰證中亦互見發熱證。其發熱同而所以致熱之因不同。不得以發熱爲邪在表。概從太陽發表例施治。

陽明發熱與太陽異者。經云陽明病外證云何。答曰身熱汗自出。不惡寒反惡熱也。蓋始則惡寒發熱。今惡寒自罷。雖汗出而熱仍不解者。卽轉屬陽明之候。當此時無論風寒暑濕所感不同而同歸火化。陽明病仲景有發汗之禁。而治法宜分經府。其熱雖甚而尙在於經者。宜以甘寒直撤其熱。如經云傷寒若吐若下後七八日不解。熱結在裏。表裏俱熱。時時惡風。大渴舌乾燥而煩。欲飲水數升者。白虎加人參湯主之是也。其邪已入府而猶汗出發熱者。


如經云太陽病三日發汗不解蒸蒸發熱者屬胃也調胃承氣湯主之。又云陽明病發熱汗多者急下之宜大承氣湯是也。

少陽發熱仲景亦申發汗之禁。少陽病本主往來寒熱而亦有發熱屬少陽者。必兼脇下滿心煩喜嘔諸證。且其脈必弦。故經云傷寒四五日身熱惡風頸項強脇下滿手足溫而渴者小柴胡湯主之。又云傷寒發熱汗出不解心下痞鞭嘔吐而下利者大柴胡湯主之。蓋脇痛嘔渴已明見少陽之半裏證。雖發熱表證未除。不得從太陽發表之例。而當以大小柴胡湯半表半裏治之也。又曰傷寒脈弦細頭痛發熱者屬少陽。少陽不可發汗。發汗則譫語。此屬胃胃和則愈。胃不和則煩而悸。蓋弦爲少陽之定脈。細則邪不在

表仲景恐人以頭痛發熱誤爲太陽證。故明指之曰此屬少陽。而又申言之曰少陽不可發汗。其所以辨其發熱之屬少陽者。前二條以證辨。此一條以脈辨也。

太陰發熱者。其脈不浮而沉。而更兼吐利腹痛諸證。經云病發熱惡寒頭痛身疼吐下者。此屬何病。答曰此名霍亂。霍亂自吐下又利止復更發熱也。吐利本太陰病。利止復熱者。陰病轉陽也。既已轉陽。其脈當浮。故又曰太陰病脈浮者可發汗。宜桂枝湯。吐下之後。津液已傷。復又往往口渴發熱。故又曰霍亂頭痛發熱身疼痛熱多欲飲水者。五苓散主之。寒多不用水者。理中湯主之。此與陽經之發熱治各不同也。

少陰病發熱最易與太陽牽混。故仲景於大青龍證必辨其無少陰證者。方取大發其汗。而又申言之曰。少陰病脈沉細數。病爲在裏。不可發汗。又曰。少陰病脈微不可發汗。亡陽故也。則少陰之不可發汗明矣。陰病必當轉陽。故曰。少陰病吐利。手足不逆冷。反發熱者不死。蓋太陽寒水之氣與少陰君火相濟爲用。此之吐利。少陰爲寒所抑。茲得陽熱之氣。而其氣還返於太陽。故反發熱不死也。然何以辨其爲少陰之發熱也。經云。少陰之爲病。脈沉細。但欲寐也。沉細爲少陰之定脈。但欲寐爲少陰之定證。且太陰病吐利。手足自溫。此則手足逆冷。更加之以惡寒身踈。其甚者厥冷無脈。又或咽痛煩躁。便膿血。種種危證。死生呼吸。蓋因少陰腎藏分配。



水火爲先天根本。故其病情寒熱錯雜。變幻不測。有如此。至發熱。則陰寒之中。猶寓陽熱之氣。而強責少陰汗者。將其人之根本先拔。至於下厥上竭。則難治矣。其有寒邪直犯少陰。而卽發熱者。如經云。少陰病。始得之。反發熱。脈沉者。麻黃附子細辛湯主之。又曰。少陰病。得之二三日。麻黃附子甘草湯微發汗。以二三日無裏證。故微發汗也。蓋必以附子鎮攝腎中真陽。俾根本先固。而後可以引邪外出。此於微發汗之中。而仍寓不發汗之義也。

厥陰發熱者。以其人厥與熱之多少。辨病之進退。厥陰者。兩陰交盡之名。然陰盡之中。實寓陽生之義。故其時陰陽不相順接。便爲厥。厥熱相等。其病可愈。厥多熱少。此爲病進。熱多厥少。此爲病退。

所謂厥者。手足逆冷是也。逆甚而至於冷過肘膝。則不名曰逆冷。而直名曰厥。此時正藉發熱爲一綫生陽。可續。故發熱爲病欲愈之機也。故曰傷寒先厥。後發熱而利者。必自止。又傷寒熱少厥微。欲得食者。其病爲愈。若發熱下利至甚。厥不止者。死。又傷寒六七日。不利。便發熱而利。其人汗出不止者。亦死。要知發熱之後。其脈必不沉而浮。乃爲陰病轉陽之眞候。故曰脈微浮爲欲愈。不浮爲未愈。此又與少陰發熱同一義也。

傷寒之脈。始終一以靜爲主。故經云。傷寒二三日。脈若靜者。爲不傳。若脈數急者。爲欲傳也。內經云。汗出而脈尙躁盛者。死。是始熱以脈靜爲易愈。而傳變之後。又必以脈靜爲眞愈之候。凡病之自



表而裏者。以太陽爲始。病之由裏而表者。以厥陰爲始。太陽雖主表。而其脈連於風府。其根起於至陰。又與少陰爲表裏。仲景慎重。不敢妄發其汗者。以此三陰病固不宜發汗。卽三陽經發熱。其致熱之因。又不全屬太陽。如病起發熱。卽兼口渴。汗出大便閉等證。此由陽明而太陽者也。又如病起發熱。卽兼喜嘔。胸脇滿痛等證。此由少陽而太陽者也。皆不得藉口於傷寒一日。太陽受之。概與發表也。

大約溫熱病起於陽明者居多。至濕溫病。其邪伏於募原。募原屬半表半裏。故其發熱。每兼胸痞腹滿煩渴不大便等證。加以骨節煩疼。舌胎如積粉。其病先犯少陽與太陰。而內連於胃府。外溢於

傷寒論
太陽濕家本自易汗出。尤不可重發其汗也。至所謂異氣者。非於六氣之外。別具一氣。蓋六氣本天地自然之令氣。因其氣之偏勝。而釀爲厲氣。故其病沿門傳染。長幼相似。乃稱曰疫。而治法仍不離乎六氣之中也。

有病已愈而復。又發熱者。此名遺熱。由於起居飲食之不慎。凡病後飲食最宜清淡。使胃中津液漸復。邪氣全盡。自然健啖。而世俗每厭肥鮮。兼之喜投補益。皆所不宜。故內經曰。病熱少愈。食肉則復。多食則遺。此其禁也。然其熱之復發。亦有虛有實。故內經云。視其虛實。調其逆從。可使必已矣。至仲景食後勞復。以及大病差後。種種各法。載明論中。更不待他求矣。

惡寒

太陽之爲病。脈浮頭項強痛而惡寒。是惡寒乃太陽病一定之證。始而惡寒。繼且發熱矣。其惡寒與發熱相兼。非如寒熱往來之熱。時自熱。寒時自寒也。所謂身大熱而不欲去衣者此也。凡風寒客於營衛之中。而洒淅惡寒者。其脈必浮。浮爲在表。故曰惡寒者表未解也。雖裏證悉具。而表未解。不可攻裏。必俟外解已。乃可攻也。若太陽病傳入陽明者。則惡寒將自罷。卽濈濈汗出而不惡寒。反惡熱矣。此太陽病初起發熱惡寒之大概也。

惡寒屬表者。脈必浮。其有不浮而沉者。陰病也。經云。發熱惡寒者。發於陽也。無熱惡寒者。發於陰也。發於陽者。病在表。宜解表爲主。

發於陰者病在裏宜溫裏爲主。若陰病而誤發其汗則陽亡之變。頃刻卽至矣。陰病惡寒以手足溫者易治。手足逆冷者難治。故經云少陰病惡寒而蹠時自煩欲去衣被者可治。又曰少陰病惡寒身蹠而利手足逆冷者不治。又曰少陰病下利若利止惡寒而蹠臥手足溫者可治。此其義也。惡寒屬表者在未汗以前是謂表實。若旣發汗之後當不惡寒矣。而反惡寒者則又不屬實而屬虛。故經云發汗病不解反惡寒者虛故也。芍藥甘草附子湯主之。蓋以芍藥甘草兩和營衛而必藉附子以溫經。則同一惡寒而未汗以前與旣汗以後又各不同如此。